

清光緒朝中日交涉史料

卷十七之卷十八
二十年



清光緒朝中日交涉史料卷十七

(一四〇四)江南道監察御史鍾德祥奏籌畫朝鮮兵事摺

光緒二十年七月十七日

江南道監察御史臣鍾德祥跪奏爲朝鮮兵事必不可以驟解進討詔書必不可以中變臣請爲全局謀自勝之策且請爲邊局陳可戰之勢恭摺仰祈聖鑒事臣奉讀七月初一日上諭聲日本無理之罪重李鴻章進兵之責而復嚴各海口以迎擊之防威怒自天中外聳慄此一時也然而日本輕狡貪詐負約反覆固非可以空言相鉗制也然則不大創之不足以示曲直於天下而禁懾犯法之虜變將安窮也臣嘗觀日本之國情旣靡敵其國以習西法而匿其內虛苟張外強於是一試於臺灣再試於琉球皆倖而售其無賴之術遂悍然敢於與中國抗爭故朝鮮今日無故橫被其毒設使李鴻章不力持其牢不可破之和議則事大有可爲也幸賴我皇上明聖剛武屏斥邪說決策必戰普天率土凡有血氣無不踴躍以須大功況日本國小而財竭聞此次兵出之後支絀益甚其各口商務四面銳減橫濱長崎之華商至不肯以現銀五十元易日本七十兩之銀紙吾華商蓋有以窺其無國實矣且日本兵素未經外大戰貌習泰西陣法並非中堅亦非同仇籍民抽丁不願者衆聞此次驅兵上船有父兄臨送吞聲以行者有中路逃逸落荒者氣亦不揚矣必不能當中國之強奮而耐

戰夫中國之耐戰冠絕五大洲何小夷謁蹶之敢逆我顏行也葉志超狗鼠怯竄爲外人輕侮實甚然彼外人亦經侮如葉志超等者耳實不敢量吾中國未用之精銳夫此精銳者李鴻章所不肯用豪傑奇士亦不屑爲之用臣今竊有大願意者敬俟我皇上特用之耳果用之臣請進言戰法日本北境曰對馬島倭兵由對馬渡海百餘里徑達釜山據爲重鎮輜重郵書此其總匯倘使從釜山通鐵路於韓城則朝鮮皆入倭掌握且將窺伺西嚮犯邊亦意中事矣今倭兵已披據朝鮮腹裏應催集南北海陸各軍圍攻韓城旁擣釜山使之備多力分必將首尾衡裂復令丁汝昌親率輪船遊弋對馬釜山之交斷其電綫卽不能徑攻島險而警以海聲倭勢自蹙吾陸軍益當奮揚不過數大戰倭決不能持久然後可得而制虜也此戰之大略也無如淮軍積久縱弛短額失伍痿蹶鈍眊路人皆知雖勒驅全隊出以當敵政遣敵禽耳如葉志超飾敗妄報專壹欺罔立按軍法豈復爲苛然則將制梃以撻醜倭非拔起突將使部勒奮擊異軍出當軍鋒卽使金躍鐵飛臣直以爲兒戲至如丁汝昌以兵輪爲偃蹇酣象之所將二十年聞警匿避不止一次今若都不敢遊弋對馬爲吾陸軍聲援復安用此海軍提督爲也非治以重罪不足示罰此亦臣萬不得已之言也顧臣今旣言之亦不能不竊俟我皇上之獨斷而用之果能中降手詔嚴切責備李鴻章以船政陸兵何以無

用至此而稍寬其自贖之效於將來李鴻章殆亦無策自贖矣不過曲全重臣之體貌或朝廷不忍卽加誅耳然邊瑣不可不辦後患不可不虞臣爲今日策勝算將妄有請矣請特旨別授一資望宿舊大臣出而臨邊卽不必知兵但差擇二三忠勇謀略曉暢海務及老於軍師之才命之幫同辦事而許其各進用得力可恃之將與勇而假之以權無功債事則有罪如此則局勢一振策力衆至天下固有人才也李鴻章不之知而臣能知之事不得止機不可失聖衷若以臣言爲不謬則請及時決以天策有敢以調處和息之說復進浸潤貽誤者罪之則擊倭而驅逐之臣竊謂尙非中國之極功况乎懲一而儆百吾一舉而制倭則彼俄英等國之陽出爲調人而陰煽以疲我之下策將不攻而已破其隱謀臣所謂爲全局策自勝者此也夫日本小夷也而橫挑中國此自取敗亡之舉動耳乃芒芒焉密託外人先授以和意抑何其無策也自古至今以和敵取侮而不誤國臣未之聞也請徵之道光已來之近事往者金陵議款則有天津之役臺灣議款則有琉球之役北界不正則有伊犁之役馬江不戰則有諒山之役狡夷思逞乘隙抵幟不威以兵恐無辦法服而舍之無損吾量賄以玩之適生其心不可不察况日本傾國兵數不當中國之一又弱不經戰雖有甲船而能與吾定遠鎮遠較堅厚僅有名速力者一艘差可強顏耳諸下者或不及向時船政之本船臣以

此知倭固內不足也我乃無端以和授之柄是不啻導之使敢至朝鮮也今能乘此赫然之天威奮起雄武授以將帥責以破虜功效南北海陸聲勢並震又皆我皇上特簡之虎臣不二心而必戰之朝氣以破此號稱二三萬之倭兵擊之則我之力新持之則彼之援緩形格勢禁勝算在我而猥曰和此何說也不祛庸人之論不足以開非常之原皇上未決戰卽臣何敢言果決戰故願爲邊局陳可戰之勢此又臣之略能自信而癖於和議之人所未必肯信者也臣竊維今日事勢必數大戰而勝然後全局可以安必將生力以戰而後邊局可以勝必期戰勝以安全局則惟我皇上可以斷獨不宜再誤而自我託人調處也聖明亦已燭其奸妄耳矣甚非計之得而臣則尙不能無憤懣也倘使光緒元年時臣得專兵殲此虜於臺灣瑯瑤之海上或不至遭朝鮮今日之變而已無及矣雖然得人則有機勢自強則有公法敵不可縱計不可緩臣不揣冒昧密摺具陳伏乞皇上聖鑒訓示謹奏光緒二十年七月十七日

(一四〇四)附件一 鍾德祥奏盛宣懷袁世凱罔識大體以和議逢迎李鴻章請立

予重譴片

再臣頃聞自天津來者多傳說李鴻章近因倭事憤鬱抱病而其心仍妄冀得以和解果如所聞是李鴻章並無作戰之氣其所部復安得有敢戰之人若僅恃之以爲重輕恐老至耄及之肺腸必非往時柱石矣臣之愚計竊以爲今日當徑自朝廷嚴旨切責之一面特簡大臣擢進才傑局勢忽張則中外震悚此一機也臣聞袁世凱係奏派駐紮朝鮮大員乃於倭兵未到之先潛蹤逃回天津實爲庸劣畏葸之尤李鴻章竟亦諱而匿之此逃官也津關道盛宣懷貪鄙諛佞罔識大體而鑽營最工是以能由登萊關道調補津關所任皆脂膏肥醲缺分千人所指無不知其由賄賂得官近來一味以和議逢迎李鴻章蓋私人也聞俄英德國諸外人頗欲竊出爲中國調處倭事皆盛宣懷與袁世凱居間請託故常入李鴻章私室屏人密語往往夜分乃出無非欲詭求調處苟且息兵是以天津徧傳李鴻章願以三百萬賠償兵費雖曰謠言恐非無因而起盛宣懷袁世凱狎暱至深聯絡一氣爲李鴻章愆患主和以冀支吾掩飾其不能破倭之劣迹全不顧蹉跌事機豈復可以不問皇上倘能將盛宣懷袁世凱暨始禍之汪鳳藻立予重譴以明是非之公而得義理之安天下必懷然於賞罰黜陟之可畏國法之不容倖逃卽不獨感激忠義勝氣百倍亦使李鴻章庶幾內自儆發以圖晚蓋共收邊功想亦聖心所期許也我國家寬大已久官吏邪飢已極今日之事竟敢欺

天臣不敢也故劾之謹附片陳請伏乞聖鑒訓示施行謹奏

(一四〇四)附件二 鍾德祥奏請決對倭之策片

再臣近來恭聞我皇上懋勤典學講誦書寫性理格言且紬繹累朝聖訓考古察識通曉大義則事理益明而於用經權嚴是非應緩應急宜柔宜剛與可行不可行之機詢謀之後斷以聖衷確然施行成大有爲之鴻業下忱曷勝欽懌臣惟古興王之大有爲者莫隆於湯武而詩書所載頌成湯者則曰智勇頌武王者則曰變伐此皆古聖人能平天下之大烈其要指則不外於震厲嚴肅以樹之風聲而後畏力懷德者無所不服紀綱四方道在乎此乃溺惑縮朒以講和者敢薄之以爲老生之常談蓋不足具論今皇上發天縱之學識示聖武之經緯決羣疑於苟偷作士氣以撻伐則臣請敬舉聖祖世宗莫大之功德以仰窺當日致太平之本原夫何嘗不主於用威而制夷狄尤不可以無威頃者嚴詔責戰聖威且立矣旬日以來忠勇義憤之士延頸企踵莫不敬俟宸策迅發以彰天討以慰安薄海臣民自強之心易曰夬決也剛決柔也內傳曰需者事之賊凡持祿養交之臣無不欲需需則吾之氣日益緩弛不振於是乃可復操其議和償費之邪說以隱爲要挾而期於必從孰利孰害焉然則

非夫以決之不可也吾中國才力氣魄皆全盛海戰陸戰皆有人制敵安邊皆可策而大臣必壅蔽闕遏之以求伸其和之說以自弱非我皇上特決之誰復敢決之如臣者亦已妄言累疏請決之而不能必其言之不見基於權貴也則言之不獨無益轉以取厭而竟乃再三重複自陳其言無所回撓顧忌焉者和則日以弱戰則日以強誤聽彼昏聩誕怯之臣以無策而和則必益弱能聽此堅直雄大之策以不旋踵而戰則必可強臣微者也其言又微也而強弱之機如視黑白若此事留變生機過易悔屑屑會議罣誤日時恐窺伺者衆將慮意外我皇上能立斷而特飭剋日以行其策則謀勇出矣大局振矣天下幸甚干冒宸嚴戰慄附片敬陳伏乞聖鑒訓示謹奏

（二四〇四）附件三 鍾德祥奏倭兵寇擾朝鮮請簡將與戰片

再倭兵寇擾朝鮮必非不戰可了而外人復揣定吾中國重臣仍不欲戰於是益陰煽日本大張戰勢乘葉志超丁汝昌等之恆怯無能肆其螳斧以啗惕北洋希冀和議可速而旁觀之狡夷更易於得機以出假調處之名而恐嚇取錢日來復聞日本與西人租賃甲船二十餘艘續添水軍則不獨可以坐塞仁川扼我海上進兵之道且可分船內駛驚擾臺閩江浙

海口此夷之故智不可不防者也臣爲今日計防不可不急而戰則又不能急所最宜急者似在我皇上之簡將帥使指顧之頃重帥大將絡繹奉命駿發將四裔咸曉然於中國之能籌邊者不在一李鴻章之宿重名也中國之能破虜者更不數淮軍之毫不濟事也一俟水陸大集剋期進攻韓城釜山必有奇捷何以知其然也今日我緩之以不戰而弛其氣以糜其財力轉瞬則又急之以戰以乘其玩而出其不意以臣料倭不能當中國况憑恃天威乎臣之拳拳不敢妄奏亦在皇上必斷與否耳議和償費何以爲中國謹再附陳伏乞聖鑒再大兵一動必不能不長籌饟項中國自有不涸之財源臣亦已策及之以待時而用不敢諉爲不能也合並陳明謹奏

(一四〇四)附件四 鍾德祥奏請特派能臣前赴臺灣察看防務片

再臣前以各海口戰船砲臺亟應慎固申儆附奏請旨飭派能臣行邊在案臣因憶及前三年曾親至廣東虎門砲臺遊歷察視並無大砲可以當攻堅及遠之用附近虎門紳民亦多與臣言其虛飾已久無一可恃不解何以玩忽至此日來復聞臺灣巡撫邵友濂電懇湖北撥借軍裝火器張之洞等正在自顧不暇頗厭之查臺灣改設行省將二十年邵友濂爲巡

撫亦四五年每年報銷至二三百萬不止何以並無備預一遇小小風吹草動矣遂爾張皇借資鄰省實緣邵友濂居平不過以巧宦爲心梯榮囊祿是其所長至於策畫邊實臣知其束手矣且臺灣與日本海綫牙錯倭倘分船內擾必臺澎先當兵衝而邵友濂毫無措置何以禦敵若曰知兵任戰臣蒿目東望尙不知可屬何人則所恃者蓋難言矣夫虎門砲臺之僞臣所見臺灣軍實之陋臣所聞然則南北洋數要口所稱有名雄防之處難保其不以無事日久而內弛以廢敵於飽食安坐之大官也此卽日以廷寄責問諸臣復何難一奏搪塞夫孰從而察覈之似不如特派能臣出而行邊如臣前片所請不過三四閱月與一二人奔走之勞而防務可以畢舉孰與夫事至倉猝而後紛紜補救追悔方來復煩聖慮也臣不勝迫切下忱謹再附陳伏乞聖鑒訓示謹奏

(一四〇四)附件五 鍾德祥奏邵友濂庸劣無能請特簡偉才出撫臺灣片

再邵友濂處心積慮不過欲謀充滿官囊而止其庸劣無能實不勝封疆重任查其撫臺以來凡臺產硝磺樟腦金沙鹽灘諸有大利可圖之局徧布私人分領之籠入彀臺全臺皆怨謗邵友濂至謂去一賊來一賊去一賊者蓋指劉銘傳也劉銘傳自光緒十年棄基隆礮臺

遁退竹塹之役積與百姓爲仇故臺人目爲劉賊云也邵友濂復侵牟奪利自封百姓亦謂與賊無異也至於臺南北及後山各防營苦窳殘廢形同乞丐望之可笑考其劣迹揆以公論實爲有負重任倘不特簡一公忠威重膽識奇偉之才出撫臺灣無事則苟且偷託有事則必致震及全閩而江浙廣東亦不免受其波蕩矣臣於閩粵洋防頗悉大勢復有不安前車之慮敢徑陳其得失以防未然關繫甚遠區區彈劾臣何利焉謹附片陳伏乞聖鑒謹奏

(一四〇五)翰林院奏編修周承光條陳大局要務據呈代奏摺

光緒二十年七月十七日

協辦大學士吏部尚書翰林院掌院學士臣宗室麟書臣徐桐跪奏爲據呈代奏恭摺仰祈聖鑒事竊據翰林院編脩周承光呈稱大局攸關急籌要務邇來朝鮮之變自七月初三以來未得捷音風聞朝鮮畏倭業已納款陰助倭者俄人也窺其叵測關東三省蓋早垂涎誘結倭人相爲掎角夫朝鮮自取禍殃本無足惜第東三省根本重地唇亡齒寒不可不豫爲之防竊謂制倭備俄莫若以攻爲守或議虛無兵餉是正不然綠營兵弁經乾隆年間補足實額計近百萬行營駐防不在此數咸豐同治時粵捻蔓延處處防堵不能移調是以專藉募軍今昔情形似有不同除沿海各鎮及有會匪之省不能輕調外若於腹地諸營酌留四

成守汛精選六成東征約得勁旅可逾十萬加之練習究勝猝募此皆有餉兵丁不必另籌
餉項恭查我朝用兵武功彪炳惟康熙年間平勦三藩地連十有三省調兵四十餘萬雍正
乾隆嘉慶以來西師準回金川青海各役用兵從無至十萬者今朝鮮特準回金川等耳我
師十萬似不爲少欽簡大臣經略節制事權畫一舉旗東指節節進兵明救朝鮮暗防俄寇
相機辦理聲色不形現在吉林邊疆暨山東登州等處難保無朝鮮避兵流民仰懇密諭疆
吏設法撫恤仍不失字小之意將來義聲感召朝鮮豪傑內應亦未可知一面嚴飭東南各
省酌調陸營移紮海口堅壁清野抽派兵船攻擾日本三十六島水陸並進俄雖助倭防不
勝防未能無懈儻倭不支朝鮮可復卽未得手而東三省兵力旣厚足伐俄人之謀亦弭邊
釁萬一俄人蠢動東路不至空虛陵寢不驚則京師蒂固矣近聞調派旗隊駐紮通州聖慮
周詳莫名欽服惟京都恭逢慶典期內秋闈士子雲集雜色人益加多似應申嚴保甲並選
步軍精銳分紮九城專責巡城稽查出入或亦防奸之一助也管窺陋見披瀝上言等因臣
等公同閱看事關軍國要務不敢壅於上聞謹合詞恭摺具陳伏乞皇上聖鑒謹奏光緒二
十年七月十七日

(一四〇六)給事中余聯沅等奏請飭下神機營無庸派兵赴通以靖人心摺

光緒二十年七月十七日

吏科掌印給事中臣余聯沅給事中臣褚成博跪奏爲請旨收回成命以靖人心而固根本恭摺仰祈聖鑒事竊臣等數日以來聞都人傳言近日神機營奉命選派弁兵防守通州初聞之時尙未深信乃彼此傳述衆口一辭愚氓無知誤以爲寇縱已逼郊圻故簡派禁兵出城守禦人心惶惶莫可理喻且都中向多游手好閒之輩遇事生風一聞此信勢將乘機煽動是不足以捍外侮而適以召內寇也竊謂京師鎖鑰全恃津沽但使津防謹嚴外寇何從飛渡通州距京僅四十里臣等常時經行知其絕無險要可守安用此未經戰陣之兵張皇出郊淆民視聽爲哉及今師未啓行挽回尙易應請飭下神機營無庸派兵赴通以靖人心而固根本抑臣等更有請者兵可備而不用不可一日不練應並請旨飭該營將領精加訓練以成勁旅猶於大局有裨臣等爲鎮定人心起見是否有當伏乞皇上聖鑒施行謹奏光緒二十年七月十七日

(一四〇七)河南道監察御史易俊奏請責令李鴻章對倭事通盤籌畫迅奏膚功摺

光緒二十年七月十七日

河南道監察御史臣易俊跪奏爲夷氛甚熾亟宜籌戰守之策以維大局而保屬邦恭摺仰祈聖鑒事竊維今日之患不在內而在外琉球失緬甸亡越南亦幾非我有祇賸此區區朝鮮尙足爲我屏蔽琉球緬甸越南距內地尙遠有無不甚關緊要朝鮮近在肘腋若被他人佔踞則東三省不能安枕東三省不能安枕則京師亦爲之震動唇亡齒寒大局何堪設想故屬國二字不能不舉國爭之以固藩籬今倭人改其內政迫令稱爲自主之國滅理橫行爲王師之所不宥近聞我軍自六月二十五六等日獲勝後屢次敗績議者謂皆由李鴻章貽之咎也當日倭人乘朝鮮內亂之後重兵壓境多方挾制顯以襲取琉球之故智與中國爲難我剋日聲罪致討不得謂衅自我開縱仰體朝廷寬大之仁不卽誅絕亦應厚集兵力以壯聲威乃李鴻章一味遷延希圖轉圜了事前後祇派兵四千餘名尙不及倭兵十分之二北洋練兵有年嗣又不惜鉅款設立海軍原以備緩急之用值事機孔迫一若毫無把握退縮不前直待嚴旨切責始添兵前往而朝鮮之險隘要害已早爲倭人所據矣委帶水師統領丁汝昌畏葸無能聞風遠遁遂使牙山一隅亦半爲倭人有凡我可進兵之處皆一律堵禦以致左寶貴衛汝貴馬玉琨等軍均麇集平壤不能飛渡葉志超以孤軍對強敵如紅

爐片雪大可凜凜反客爲主是誰之過雖聚六州之鐵不能鑄成此錯也倭人一黑子彈丸之地竟敢鷹瞵虎視藐我中邦我尙不能先發制人滅此朝食設英俄等國一旦借端啓衅又將何以禦之臣念及此寒生毛骨李鴻章鈞衡在握當亦深悔慮之疏也然事已至此卽重治其罪亦屬無益是當統籌全局爲恢復之計以求必勝之謀兵法云知己知彼百戰不殆倭人船堅礮利水戰是其所長我不如多招馬步隊較易取勝湖南民情強悍散勇最多趕速招募四五十營衝鋒破敵可稱勁旅劉永福業已自請報効吳鳳柱徐連陞等驍勇善戰均可獨當一面如令分統各軍必能得其死力劉錦棠劉銘傳皆百戰名將威望素著或特簡一人督辦朝鮮軍務以一事權聽其居中調度不爲遙制該撫等受恩甚重當聞命卽至如有託故規避情事卽加以不測之威爲不知大體自外生成者戒惟是處處設伏扼我進路若亟圖兜剿恐徒傷精銳於事無濟計惟有先行繞道前去擇地駐紮相機而動抑或待大同江冰合長驅直入合力圍攻酌留二三千人豫爲後路策應葉志超一軍亦可分投並進相爲掎掎兵艦則游弋長崎對馬島及牙山口外一帶阻其糧道並聲東擊西以牽其勢如此猶不能掃穴擒渠臣不信也至分兵內犯勢所必至近有倭船多隻往來威海旅順等處近岸卽迎頭痛擊不可信其虛聲弛我實備沿海沿江各口諒已加意防範天津爲京

畿門戶臺灣崇明皆孤懸海外尤爲喫重當必布置周密以備不虞臣愚以爲倭人國小而弱苟無他國暗中幫助何足與中國爭雄不過一時得所憑藉遂任意鴟張耳但相持一年之久必計窮力蹙而勢不支自俯首求和惟命是聽不特朝鮮仍修我職貢且可戢各國窺伺中國之心儻因偶爾挫失遽束手無策置朝鮮於不顧俄羅斯坐俟其旁不旋踵必起而奪之中國不能過問後患更不可勝言中國安危之機強弱之分在此一舉伏願堅持定見責令李鴻章通盤籌畫迅奏膚功毋得一籌莫展致干咎戾李鴻章身膺重寄責無旁貸當策出萬全不負委任矣臣愚昧之見是否有當謹繕摺具陳伏乞皇上聖鑒謹奏光緒二十年七月十七日

(一四〇七)附件一 易俊奏請諭令海署將土藥稅釐暫充軍餉片

再用兵之道以籌餉爲先弊端旣開未知何時了局當先籌有著之款至少亦須千萬戰事方有把握各省庫款支絀各督撫諒極力籌措以備不時之需聞戶部已籌有四百餘萬尙須從旁設法俾資接濟查土藥稅釐每年約百餘萬金自開辦後卽經海軍衙門奏請全數撥還各要工欠發之款現欠款業將清結又奏請撥爲修理北洋兵輪鍋爐之費刻下需款